

臺灣文獻匯刊

■ 陳支平 主編

第四輯

第十四冊

◎◎ 九州出版社
◎◎ 廈門大學出版社

臺灣文獻匯刊

第四輯 ◎ 第十四冊

西霞文鈔（二）

泉州從政紀略

慎余書屋詩文集（節選）

◎◎九州出版社
◎廈門大學出版社


與徐印之書

早晨勞枉駕傳諭招同渡臺弟以末學輕才猥蒙老師大人
賞識吹枯噓潤累次栽培而愛待之情更同骨肉揆之分誼
本不應辭但細商之家慈家慈一時殊有難色一則以弟素
體多病重洋阻隔既不放心一則前此欲隨福節相東渡初
意本非冀弟博取功名特以事關緊要恐辭不獲命或行
入告阻之反成笑柄是以無如何命弟自酌進止然自得信
後舉家日夜憂惶每焚香籲天不願弟果建功名但願平安
早歸骨肉重聚及得弟不果往之報心始釋然弟歸家時家
慈酬願謝天曾叩首萬遍此弟所隨同行禮而親覩者也今

日之事據臺匪大勢已定既非爲博取功名至善後事宜則爲日稍寬臺地不乏文武盡人可以與謀弟本無所知又非必需於弟遽聞遠去心實躊躇至合家男女懲於前恐衆口嗷嗷人爲一說弟又迫於羣論不能以義自裁昔人云丈夫舉事當遠室家一在家庭便多牽制信乎此中情事可慚又可嘆也但弟亦有一說前此節相初到鷺島時軍機來見弟以未知節相意氣如何曾以疾辭嗣後節相亦遂以疾置之此時若隨老師東渡似屬事勢險難則却聘而托採薪及局已承平又濫竽而思染指進退兩截不獨無以見軍機并恐與衆人相見亦殊少意味也積此數端實難隨侍伏懇轉爲

據情稟覆老師至善後事宜有鄙見所及者白不敢藏拙當
續行具稟上聞以備采擇匆匆佈覆不能盡意統惟朗鑒不
宣

西霞文鈔



上中丞徐兩松師臺灣善後事宜書

月之望後面晤世兄知旌節刻日渡臺辦理善後事務臺民
新更變亂出之水火重見雲天又得夫子以慈祥愷悌之心
爲經久撫循之計知此中登之仁壽造福無窮蓋真臺民之
慶而又不僅臺民之慶者也猶憶泉城夜話挑燈列坐酒酣
耳熱之後夫子有言使我得爲臺中巡撫一切建置措施
朝廷皆假以便宜不爲掣肘三年之後必得小康若再加以
數年可爲樂土光策與郭門生周藩與聞之下咸私贊嘆以
爲必然顧是時特以爲偶爾戲談且圖一快而不謂有志者
事竟成夫子一片愛民善俗敦懇之誠而上蒼果有以應之

也欣躍忭舞且喜且賀光策素蒙愛育本欲追隨左右學習
吏事以酬夙心特以眷戀庭闈不能如願伏祈原恕蒙索善
後事宜節畧光策碌碌庸材毫無所解願承夫子芻蕘必採
之盛心雖自審迂拘然不敢不竭其愚忱以塞明問聞信之
後卽思具稿上呈特念事體重大光策智畧鈍遲每有屬思
輒經營累日又時或諮詢同志以審其是非不覺輾轉因循
遂逾旬日茲特錄稿呈覽其中有衆人所共見共知而不憚
贅言者非敢於自矜蓋欲夫子據此爲底稿逐條審之以另
加損益也其有一人所私見明知其迂濶難行而必爲論列
者意夫子圓心慧覺均此一事或另有變通之方而仍施之

無碍未可知也就中唯屯田一事義例最繁家鮮藏書一時不能悉詳其概俟續有所得仍隨時飛稟以聞專此肅稟統惟鈞鑒不既

一議定章程

現在臺地急務莫大於安撫一事叛黨既散流亡既歸則所以安插賑恤之者最宜得體但地域遼濶頭緒紛繁需人既多意見各出若不畫定章程頒示委辦員吏冒昧者既不知所從不肖者又易於漁利非法之善也鄙見宜將各項預先議定令書吏抄成節畧發與各委員悉照規條辦理其有地勢情形不同應行損益者許各委員隨時稟請遵行所有各

欵應辦之處謹就管見附錄數條于下餘請鑒裁另爲更定焉

一量地遠近及事勢繁簡以定委員如村庄不甚殘破難民各有本計不過補苴清理毋煩悉行仰給于官者雖數十里委以一員足司其事若村庄盡燬流散無依一切事宜俱需官爲措置者當以十里爲率置一委員其甚者更宜另派協理或管編置或管賑恤各司其事庶有責成一村舍焚蕩歸無所止者宜剏爲草屋臺地巨竹最多立竹爲樑棟榜之以籐編茅爲蓋織篾爲門價廉而易辦所在村地各酌人民之繁簡設立數十百間以待難民之棲

止隨到隨居每戶以一間爲率人衆者增之其附近之小庄權令并入大庄一例編置所有床竈器具必不可少者每戶酌給價值令其自置

一每戶難民飭令所司造成清冊男女丁口若干實在極貧次貧可以存活與否有手藝與否每丁每日酌給銀若干或米若干或按月按旬給發約以幾月而止逐一議定以便遵行其有立即待哺不及俟造冊報者應如何便宜先爲賑恤亦當議定

一清查各戶難民向係何業或農或工或商販或係游手現在疲病強壯與否農則查地畝若干應否給借牛種工

賈則查其可否充當匠役以待官工游手則訊其願充屯田佃戶與否逐一造冊以便調發

一地畝有契券者照契券還之無契券者令該庄業戶出

結四鄰互保有欺詐侵占者罪之

聞臺地各庄俱有業戶業戶者統一庄佃戶納

糧之總名也業戶之下有董事董事之下方爲佃戶凡查地畝之實否當先飭業戶核報

一民間田畝隨處宜令歸業百姓以木牌或竹籤標其四

至布插田間其有未插未標者卽屬流亡曠地另歸稽查

一凡死亾尸骸暴露者當隨地使人專司其事擇地掩埋

其有病傷殘廢者亦分委醫士量爲料理又今歲冬底多

受饑寒明歲春夏之交瘟疫必起亦宜預爲留意

一凡流亡婦女或罪人妻孥獲自賊中應行收贖遣散者
宜擇老成者專司其事

一凡各款應用銀餉價值當量爲估酌額數以付各委員
一凡民間刀劍鎗銃凶器之屬當勸令繳官給以厚價資
其生理

一各委員隨各庄難民所歸每五日一彙報以便核銷其
有浮冒侵匿者另派風力聰察道府隨時抽查

一議散義勇

臺地初定官兵不可驟散而義民則不可不盡散蓋民氣乍
蘇驚竄未帖雖賊踪已解死灰未必其復燃而孽黨尙存寬

罔難期其盡息昔朱一貴之亂平定之後亂者數起將及一年是不可不防其弊將來如滿洲黔蜀楚浙之兵可酌量機宜先爲遣回而閩省及兩廣之兵定要分駐各要區以時訓練使隱然有大兵之可畏方足以攝其氣而潛消其謀若義民則出於一時所召募素未教訓良莠雜糅又新有功勳氣驕而龐必難約束若不隨時解散安插弊害極多今未知臺地所以散之之法若何竊忘其愚酌擬數條以備稽采

一隨地遣散如彰化平則散彰化之義民諸羅平則散諸羅之義民以次而及府城鳳山隨地一例辦理

一稽查各義民中果有出力殺賊立功已經衆著報聞者

臺匪倡亂彰化自耿遊擊所領七百兵覆亡之後彰化卽爲
空城附近鹿港各處無可調發所以賊僅千人而敢於長驅
叩關把臂竟入者非池不深城不堅以無人爲之守也自賊
起事至入城中間得信已一日有餘非倉卒不及備者比使
有數百兵以爲之主出而號結居民據城爲守以待援軍賊
鋒雖銛亦何至肆無忌憚遂流毒若此則兵額之不可不增
者勢也鄙意縣城固當多宿重兵然關津衝扼各要害處俱
宜籌度地勢張立一軍以爲援應多則千人少則五百人相
去遠近以四五十里爲率
使有竊發而附近得以勢
相依爲妙不宜零星散碎至內山險隘處所亦當隨地議設
屯田如羅漢門木岡山十
八重溪水沙連之類使各屬指臂相聯俱隱然有數枝

重兵以示形勢則調遣有資奸民不敢生窺伺之心卽械鬥之風亦必有所畏忌矣

一土兵與客兵當兼爲用也臺地額設兵丁向皆內地派撥此自有深謀大計不可驟更但自古邊方戍守之兵與其用客兵實不如土兵之得力客兵隻身遠戍每有苟且之思毋論地勢情形不如土兵之熟悉卽在彼日久究屬僑寓不甚相關一切地方剽掠寇盜之案或倡會聚衆之人雖屬明知無不容隱包藏希圖挨過年班便可誘諸他人安還故里其不肖者在塘汛則武斷鄉曲罔詐平民在城市則開賭保姦包攬漁利蓋無妻子室家之累故不思

爲遠圖自恃爲未久卽去之人故不憚於作惡也父老相傳內地
初戍臺灣各悲泣訣別以往近歲以來有管謀而不得者其情可知矣 至一旦緩急有事則
觀望相推莫不自以爲局外之身孰肯悉力以任局中之
事臺兵勇怯情形觀於府城戰守義民與官兵孰爲出力
可以借鑒矣今雖不可全用土兵竊意客主當相參用或
每軍之內半以客兵半以土兵或分軍分地此用土彼用
客或分客兵爲戰士兵爲守或年班輪替者耑需客兵屯
田防守者耑需土兵隨宜斟酌至土兵不必另招卽以義
民挑補此亦散義民之一法也
一官司當增民壯也海外情形不同內地兼以漳泉夙仇